

四庫全書

史部

欽定四庫全書

皇朝文獻通考卷六十七

學校考

五

太學

三

雍正十三年九月

皇上初登大寶

恩詔文官在京四品以上在外三品以上武官在京在外二品以上者各送一子入監讀書

恩詔各省府州縣衛儒學以本年正貢作恩貢次貢作正貢

定河南新設府縣各學出貢例陳許二府俱俟十二年後照例一年一貢淮寧石梁二縣學各照例二年一貢

又申定江南徐州府學歲貢例照州升為府例行定福建建寧府各學出貢例建寧升府歲貢一人永春升州三年二貢新設霞浦二年一貢古田分

設屏南照二年一貢之例兩縣輪貢臺灣府新設彰化十年後四年一貢

又

廷試直省選拔貢生

乾隆元年又申定八旗拔貢生考選助教例凡肄業期滿遇官學助教員缺准與各部院咨送人員一同考選

更定河南南召縣學二年一貢例

定廣西西隆等州縣學貢例以西隆州額廩四名
三年二貢思恩縣學額廩五名二年一貢均屬太
驟改為四年一貢又上思河池等八縣及永寧州
額廩多未補足改為三年一貢

定陝西同州府學貢例州升為府俟十二年後歲
貢一人

定湖北宜昌府縣學貢例宜昌州升府十二年後
歲貢一人彞陵州改東湖縣照縣學例出貢

定山東泰安府縣學貢例泰安州升府俟十二年
後歲貢一人新設荷澤泰安二縣各照縣學例
定八旗官學生肄業期滿者得補官學助教例
申嚴貢監生包攬錢糧之例侵收入己者照例革
去貢監仍照常人監倉庫錢糧律並贓論罪定擬
八十兩以上照不應為而為之律杖八十仍革去
貢監如不及八十兩以上仍照攬納稅銀杖六十
之例定擬收贖

揀選八旗直隸各省拔貢生分別錄用交吏部以
知縣試用者十八人餘令吏部詢問各生願以佐
貳官用者以佐貳用願就教職者以教職用二年
二月續行揀選直隸拔貢亦如之

申明舉貢生員概免雜差之例奉

諭雜色差徭紳衿例應優免乃各省竟有令生員充當
總甲圖差之類者殊非國家優卹士子之意嗣後舉
貢生員等著概免雜差俾得專心肄業

二年復貢監考職之例先是雍正年間以捐納貢監多托人代考職銜之弊遂經停止至是奉

恩詔貢生監生每年仍派大臣官員考定職銜照舊例送吏部註冊

恩詔貢監生在監肄業者免坐監一月本年十二月恩詔同

又

廷試續到直省選拔貢生

又

命國子監

文廟大成門大成殿改用黃瓦崇聖祠著用綠瓦

詳見

祠祭門

命倣宋儒胡瑗經義齋治事齋法嚴課諸生凡明經者
或一經或兼經務取

御纂折中傳說諸書探其原本於人倫日用之理切實講
明其治事者如歷代典禮賦役律令邊防水利天

官河渠算法之類或專治一事或兼治數事務窮
其源流考其利弊司成考課之時必以湛深經術
通達時宜稽古愛民之識三年期滿即所學分別
等第以示勸懲尋又定凡祭酒季考司業月課出
四書題一道五經講義各一道策問各一條助教
等官每月按堂考課亦如之

定稽查肄業諸生出入禮部議准學中設簿每日
令助教等官一人稽察諸生如有事故告假者悉

令將事由登記於簿月終移送監丞呈堂有肆行
出入及出入過多者勒令出學本堂師容隱者察
出記大過一次其有剽獵浮華不務實行者本堂
即行糾舉亦毋許隱徇

定安徽潁州等府縣學貢例潁州升府俟廩額補
足先將鳳陽府撥歸之廩生較食餼先後照例歲
貢一人其餘陸續挨貢新設阜陽縣照縣學例二
年貢一人

定山西朔平寧武府等學歲貢例朔平寧武人文
漸盛三年二貢又神池五寨照縣學例行
傳拔貢生揀選引

見之例先是禮部奏定選拔貢生

廷試考列一二等者九卿會同簡選由部引

見簡用其考列三等者傳其簡選照例劄監肄業凡宗
學義學教習即於此中考取三年期滿以知縣銓
用其肄業期滿者送部照例銓選至是又定拔貢

到部概停簡選引

見仍由部奏請

欽命大臣考試劄監肄業如有文理荒謬者照例議處
其肄業期滿除照例銓選教職外果有經義治事
精通練達品學兼優者祭酒等官覈實保薦引

見以知縣教職

簡用仍照例輪班序選

三年

上臨雍禮成以聖賢後裔來京觀禮者三十一人入監
讀書先是衍聖公孔廣森奏視學大典聖賢後裔
例得陪祀五經博士東野衍兆未得一體觀光仰
請

敕部收錄奉

旨允行又

命以先賢閔氏冉氏言氏卜氏顓孫氏端木氏之世襲
五經博士均照五氏例行取陪祀并取閔冉等氏

各二人赴京觀禮

御書與天地參四字為

文廟匾額

御書氣備四時與天地鬼神日月合其德教垂萬世繼

堯舜禹湯文武作之師為

文廟對聯懸掛並

頒各直省懸掛學宮

大成殿

互見
贈門

定六堂肄業生額數每堂五十人在內肄業者三十人每人歲支膏火銀二十四兩在外肄業者二十人每人歲支膏火銀六兩凡到監之貢監生詳加考驗擇文優品端者充補

命國子監選正途貢生善書者十人移送

武英殿錄書仍給與在監膏火數年後行走勤慎該管王大臣秉公具奏酌量議叙

定八旗官學生考取監生之例凡八旗子弟選取

入學三年之內令其專誦經書朝夕講課三年後
監臣考驗擇其願學漢書資質相近者歸漢文班
分隸教習令其專心講誦其年齒已長願學繙譯
者歸滿文班分隸助教令其專心繙譯其歸漢文
班者不必專讀四書亦使講求經史為有用之學
每三年一次監臣錄其可以應考者奏請

欽派大臣考試優者授為監生由官學生而升太學使
與拔貢人等明經治事期滿擇尤異者一同保舉

考選錄用至六年又奏准官學生歸漢文班者通
年以來頗知奮勉但諸生年幼度其資力止能於
四書外專治一經史冊浩繁乍難責其研究定於
明年八九月間試以經文一篇論一道優者酌量
拔作監生期滿尤異者保舉

停止教授八旗官學算法專設算學先是雍正十
二年八旗官學增設算學教習十六人教授官學
生算法至是以設立官學教養八旗子弟專以讀

書緒譯為業算學理數精微非童稚所能驟通況
以一時之暫教授三十餘人勢難遍及所有官學
生習學算法之例概行停止尋議令欽天監附近
專立算學額設教習二人滿漢學生各十二人蒙
古漢軍學生各六人即以向來八旗教習算法由
舉人筆帖式貢監生員出身者充補教習補完之
日即於學內學習有成之人考選充補五年期滿
量補欽天監等官其滿洲蒙古漢軍各學生即於

八旗官學生內擇其曾學算法資性相近者不拘
旗分選取漢人無論舉貢生童或世業子弟願入
算學者聽候考試錄取俱照官學例月給膏火功
課中線面體三部各限一年通曉七政共限二年
每季小試歲終大試分別勤惰去留五年期滿舉
人出身者以博士用餘俱補天文生

裁外肄業生留內肄業生一百八十人每歲各加
膏火銀六兩其外肄業生一百二十人裁去從禮

部尚書管監事趙國麟請也

定湖南慈利永定二縣學貢例二年一貢

定湖南沅州府各學貢例沅州升府祇轄三縣俟

十二年後照州學三年二貢新設芷江縣照縣學

例

定廣東商學貢例照天津濟南二府遇換貢之期

二年一貢

定未經報部之歲貢身故例凡府州縣學廩生已

經考取歲貢給有貢單於未經報部本生身故者
即於報冊內聲明達部准作貢生以示矜恤其本
年歲貢仍將陪貢頂補所有旗匾銀兩給頂補之
生

四年定算學事宜文移案卷俱歸國子監管轄稱
國子監算學其教習之飯食衣服由監行文支給
至十年奏准以欽天監天文生二十四人撥歸國
子監算學肄業無庸別給膏火其一切教法及應

試考取均照算學生例倘教習不敷即選學業有成之算學生協同分教已補者即食本俸未補者仍領學生膏火十二年又奉准教習未滿五年分教未經實授遇有陞任如實心訓課均仍留教習之任令滿五年奏明交部議叙

更定雲南宣威雲龍等州歲貢例宣威暫照縣學例二年一貢雲龍州舊定二年一貢今改照州學例三年兩貢

定臨榆縣學歲貢例時改山海衛為臨榆縣議照
縣學例二年貢一人

定福建福鼎縣學歲貢例時霞浦縣分設福鼎縣
議准仍照例二年輪貢一人

定八旗官學生考補各部寺庫使之例凡遇缺出
考試能緒譯者四人咨部考擇充用後又定每缺
一人咨送三人與覺羅官學生一并由吏部考擇
充用

五年定廣東豐順鶴山各縣學歲貢例由嘉應州
海陽揭陽大埔三學撥入之舊廩鶴山縣學由新
會開平二縣學撥入之舊廩均按年先准出貢新補
本學廩生俟十年後准三年一貢

定廣西泗城鎮安二府及歸順州學新設廩生出
貢例俟十年後府學三年貢一人州學四年貢一
人

定雲南歲貢例向例雲南歲貢必係現食餼廩之

生其已補廩生而或以丁憂事故開缺未經補實者雖年深亦不准貢與各省歲貢之例不符至是禮部奏定嗣後遇應貢之年不論實廩虛廩挨年序貢以昭畫一

定歲終甄別肄業生去留每於歲終將肄業生名數奏明除選用佐貳等官及考補教習外其餘諸生有三年期滿者咨部銓用其未滿三年而肄業已在一年以上者監臣復加簡選果係才可造就

准其留監餘即咨回本籍歸原班挨次補用其願
留京應試者聽

又大學士管監事趙國麟議檢討夏之蓉奏成
均造士請倣宋胡瑗經義治事齋例詳明規制
嚴立勸懲諸條久經舉行毋庸再議惟各
省選拔貢生及選舉優生不無冒濫應令
直省學政嚴加考試務拔真才得

旨允行並

諭成均課士之道惟貴躬行實踐不在多立科條如
徒視為具文雖再增條款又復何補是惟在國子諸
生自知黽勉則古稱先務為明體達用之儒勿役役
於祿位功名之念而司訓課之責者又復善為誘掖
切加勸懲則辟雍鐘鼓教化聿興而珪璋特達之士
亦從此輩出矣是月復奉

諭士為四民之首而太學者教化所先四方於是
觀型焉比者聚生徒而教育之董以師儒舉古

人之成法規條亦既詳備矣獨是科名聲利之習深入人心積重難返士子所為汲汲皇皇者惟是之求而未嘗有志於聖賢之道不知國家以經義取士使多士由聖賢之言體聖賢之心正欲使之為聖賢之徒而豈沾沾焉文藝之末哉朱子同安縣諭學者云學以為己今之世父所以詔其子兄所以勉其弟師所以教其弟子弟子之所以學舍科舉之業則無為也使古人

之學止於如此則必可以得志於科舉斯已耳所以孜孜焉愛日不倦以至於死而後已者果何為而然哉今之士惟不知此以為苟足以應有司之求矣則無事乎汲汲為也是以至於游惰而不知反終身不能有志於學而君子以為非士之罪也使教素明於上而學素講於下則士者固將有以用其力而豈有不勉之患哉諸君苟能致思於科舉之外而知古人之所以為學則將有欲罷不能者矣觀朱子此言洵

古今通患矣夫為己二字乃入聖之門知為己則所講之書一一有益於身心而日用事物之間存養省察閤然自修世俗之紛華靡麗無足動念何患詞章聲譽之能奪志哉况即為科舉亦無礙於聖賢之學朱子云非是科舉累人人累科舉若高見遠識之士讀聖賢之書據吾所見為文以應之得失置之度外雖日日應舉亦不累也據今之世雖孔子復生也不免應舉然豈能累孔子耶朱子此言即是科舉中為

己之學誠能為己則四書五經皆聖賢之精蘊體而行之為聖賢而有餘不能為己則雖舉經義治事而督課之亦糟粕陳言無補實用浮偽與時文等耳故學者莫先於辨志志於為己者聖賢之徒也志於科名者世俗之陋也國家養育人材將用以致君澤民治國平天下而囿於積習不能奮然求至於聖賢豈不謬哉朕膺君師之任有厚望於諸生適讀朱子書見其言切中士習流弊故親切為諸生言之俾司教

者知所以教而為學者知所以學

定緣事斥革之貢監生准以原名應童試及捐復
例禮部奏准緣事斥革貢監除包攬詞訟武斷鄉
曲及凡實係本身重犯於律無可貸者仍照舊斥
革外其有因人波累與本身事犯情有可原及罪
在杖一百以內革後能改過自新者均准以原名
應童子試監生准以原名捐復其應行收考收復
者地方士庶不得挾嫌告訐違者以誣告論

六年又定酌減肄業生額數於內肄業生一百八十人內撥出二十四人作外肄業計其膏火可給一百二十人監臣仍詳加考驗分隸六堂倘月課季考有曠怠不到者即行扣除

頒發

欽定四書文分給太學及八旗官學諸生先是元年上以時文風尚屢變不一非明示以準的則主司難操繩尺以度羣才士子亦難合矩矱以應搜羅

特命學士方苞袁集故明王唐歸胡金陳章黃諸大家
及

本朝劉子壯熊伯龍以後作者時藝精選數百篇批
抉其精微奧窔之處頒布天下以為舉業指南至
是刊刻告成

頒發直省并

賜太學及八旗官學肄業諸生

定漢算學生得由童生考取監生應鄉試例向例

只滿洲蒙古漢軍算學生得與官學生一同考取
監生入場至是議准得由童生考取監生應鄉試
俄羅斯國遣其子弟來學於監中滿漢助教內簡
發文理明通者各二人引

見簡用滿漢各一人教習清漢書衣服飲食等項由理
藩院給發九年奏准俄羅斯學漢助教為額外助
教咨部別行銓補後復裁去仍照滿助教例以六
堂內助教兼管俄羅斯學事務

七年

上以我朝屢開恩科加添中額所取進士濟濟多人而
舉人則日積日衆竟有需次多年而不得一官者
又添拔貢以分其缺數年一次舉行則人愈多而
缺愈少舉人銓選更為無期

特諭拔貢乃生員之優者夫既為文學華瞻之青衿則
應科舉時自可脫穎而出又不專藉選拔以為呈身
之路也查從前選拔或數十年或二十年一舉今則

六年一舉為期太近理應酌量變通嗣後著定為十二年選拔一次又以各省應試生員貢監由學臣錄送入場向例每舉人一名額取科舉三十名嗣後加至一百名而學臣於科舉之外遺才大收一概錄送且有督撫好行其德普收送考者以致文理荒疎之人皆得濫冒入場試卷太多不但試官於倉猝之中難於別擇即浮薄之士子將以觀光為游戲

特飭學臣慎重辦理毋得濫濫並永著為例

定貴州永豐州學新設廩生出貢例俟十年後准
作四年一貢

八年又申定八旗官學漢教習期滿交送印冊例
凡漢教習每人給印冊二本將三年內所教學生
若干名并學業功課詳細填註期滿時以一冊交
新教習收存照例填註一冊呈送監臣秉公察核
照例分別等第出具考語引

見酌用

定雲南東川昭通二府及鎮雄州永善縣各學新
設廩生出貢例府學三年一貢州學四年一貢縣
學五年一貢至二十三年改定俱四年一貢

定山東商籍廩生出貢例十二年後五年一貢
定甘肅口外安西等五衛廩生出貢例十二年後
六年一貢

九年禮部奏各省拔貢生自停止簡選引

見後領卷赴部者日少前因到部士子苦於守候積至
二三十名即奏請

欽命大臣考試今各省拔貢未到部者尚數百名雖積
至十餘名其先到者因資斧告竭又復回籍再難
積至二三十名若干餘名即奏請

廷試殊於體制未協查拔貢現例無論考試一二三
等均歸國子監肄業嗣後凡拔貢到部由部驗到
即劄國子監會同考試文理通者准為拔貢留監

肄業荒謬者即行斥革如文理雖不荒謬而辭句
疵累不稱拔貢之選者發回原籍肄業該學政仍
照例議處從之

十年又申定考核蒙古教習例以五年期滿為率
監臣詳加考核實不能教習者飭令歸旗優者分
別等第填註考語引

見記名以應陞缺補用

十一年更定考用八旗滿洲官學助教法先是以

繙譯題一道考取至是增添漢文論題一道兼優者方准錄取其現任筆帖式等坐補助教者非舉人恩拔副歲貢生生員出身之人不用至十五年又定考試時准多取數人記名遇缺挨次補用定直省拔貢生入監考到考驗例向來貢監生入監先行考到列一二等者再行考驗貢生列一二等監生列一等者方准入監肄業今定拔貢生亦如之

停止額外助教之例時有協同助教學習行走者
名為額外助教監臣奏請可否給與單俸得

旨照請給與單俸嗣後額外助教之例著停止

定稽查援例貢監年貌籍貫之例凡直省援例貢
監生造冊報部即將本生年貌籍貫三代履歷造
冊送監本監別設號簿列名銓記各給印票一紙
在外者發與督撫轉給本生在部報捐者本生親
領倘有斥革病故者一面報部一面繳銷印票

定四川岳池縣學新設廩生出貢例十二年後准
三年一貢

定湖南永順府及永順保靖龍山桑植四縣學新
設廩生出貢例俟十年後府學二年一貢縣學三
年一貢

定陝西潼關縣學裁歸同知廳學廩生出貢例縣
學現在之廩生留於廳學二年一貢俟三次歲考
後存廩十五名三年一貢

定雲南普洱鎮沅二府恩施縣及黑白琅三鹽學
新設廩生出貢例俟十二年後府學三年一貢縣
學鹽學俱五年一貢

定山東威海靖海二衛歸併文登縣學廩生出貢
例文登額設廩生二十名威海靖二衛歸併各二十
名作為候廩人多額少挨補無期因暫准一年一
貢俟舊存二衛廩生貢完仍照縣學例一年一貢
十二年考試八旗肄業期滿之世職人員

十三年

恩貢十三氏優生時

上東巡

念十三氏子孫遠承世緒濟濟膠庠其中當有文行兼優者

特命學政甄拔數人咨送禮部貢入成均示鼓勵焉

裁滿洲司業一員向來蒙古司業漢司業各一員

惟滿洲二員至是裁去一員以符體制

十四年平定金川

御製告成太學碑文勒石學宮

文曰天畀我皇清握乾符俯坤軸涵括萬邦悉主悉臣
五后繼承創守佑啟亦惟是二三蓋臣布德宣力予曰有

先後予曰有禦侮用造我不丕基罔有蘖芽罔不煦嫗
長養游於大當粵有金川娑羅莽者居西蜀桃闕以
外界綽斯甲小金川之間向曾從征得受符檄與諸
土司齒顧恃其險遠夜郎自大構釁鄰番各土司申

訴封疆吏吏曰蔓之不圖豈其視為甌脫乃請兵籌
餉期掃其穴而司其事者或怯縮以老師或獯狻以
蓄志軍無適從事用弗集予心憫然念邊徼之不寧
或致增防置戍重勞吾民大學士忠勇公傅恒義同
休戚毅然請肩斯任乃命以經畧印益厚集諸路軍
芻粟相繼閭閻不驚卜吉於戊辰十一月之三

日禡牙以指所征朕親御武帳賜經畧酒以行天日和昶
陽氣宣復都人士聽觀聳躍罔不忭喜謂露布之旦

暮至也乃歷燕晉驅秦隴越劍閣絕川江臨桃關之
巖經天射之峻又日討軍實而教誡拊循之均其渴
飲饑食同其曉征夜眠至於密贊機務親草奏章則
又經畧獨勤其勞而諸武臣有所不知有弗能共者
恩威既明士用益勵度番落如戶庭過部伍於衽席
奸酋授首軍聲大振復以巨礮擊其碉堅碉以摧將
俟諸軍之集搗其中堅而番酋駭瞿駭喙稽首請降
經畧臣以彼罪重惡極窮而乞生久或渝且背焉慮

不允所請朕惟天地之德在好生彼蟻潰而鼠駭者毋
寧赦而宥之且求降而盡殲之不可謂武矧不足以
污我斧也於是經畧宣朕明旨登壇受降己巳二月
之望日金川平定捷音至京是役也深入數千里奏
凱未七旬而振旅之師多有返自中途未究其用者
昔之成功已蜀如建武之定公孫江陵之降李勢皆
在版圖之內無足比數廷臣舉

皇祖朔漢

皇考青海成例請勒碑成均以示來許夫秉丹誠而運籌
決勝永靖荒徼者經畧大學士之功也商可否於帷
幄衝石矢於行陣者參贊大臣及諸將士力也朕何
有焉惟是體

乾元之德凜佳兵之戒保大定功安民和衆庶幾可以垂
則乎乃系之辭曰惟

天生人類聚羣分凡茲林林孰非我民有羈而縻有誨而
諄豈伊異視遠近殊倫守在四夷稽古名言無已用

之寓義於仁蠢彼金夷恃其險阻蠶食殫張謂莫我
拒不靖不庭侵厥鄰聚駭奔叫以干大咎匪棘匪
紓玃狁之故我張我伐玃狁之故我師既集賊亦相
持匪敢相恃懼罪自支兩易寒暑敕功稍稽賊益以
狂怒臂當車罪臣既誅以徇我師朕咨於恒汝往視
之朕咨於恒惟汝同德惟我庶士亦久於後將茲旗
兵羽林神策其勇熊羆其心金石何敵弗摧何功弗
克濟以汝忠奏捷頃刻恒拜稽首臣弗敢愛既

禡既宜師出於京師出於京時惟一陽未逾五旬乃壓
其疆前旌獵獵有節煌煌羣番乃驚謂自天降惟彼
攸恃曰良爾吉以偵以諜如鬼如蜮其恃爰誅其類
股慄紀律是明戎兵是詰鑄礮攻碣其守以矢惟是
懼誅潛勿敢出其潛勿出乃旦夕延將齊吾軍披其
中堅大鞬大膊期日之前彼乃窮蹙乞降悚虔惟命
是從六事永遵除道築壇肉袒羊牽赳赳鍾琪乃度
之愬聿抵賊巢開誠以諭携其二酋軍門親赴悔罪

歸誠車塵馬足順斯撫之昭我王度昔也雷霆今也
雨露七縱諸葛單騎汾陽曰我相臣於前有光晉爵
錫服黼黻龍章速歸黃閣左右贊襄休養生息惠鮮
蜀邦我武既揚無疆惟慶

十五年

恩詔國子監監生及官學教習俱著免期一月
恩詔各省儒學以正貢作恩貢次貢作歲貢

十六年

恩詔國子監監生免坐監一月

定考取八旗官學漢教習恭候

欽命大臣至監會監臣彌封閱卷先是由監臣將肄業之恩拔副優歲各項貢生考取充補至是改定此

例

奉

上諭各省選拔貢生經朕降旨以十二年舉行一次計至癸酉年即屆選拔之期惟是來京朝考揀選引見

劄監讀書或以知縣等官試用或以教職即用或以
教職歸班序選條例屢經更定朕思選拔於每學數
十百人中拔取一二人且不糊名易書可以驗其人
才核其素行自當精擇以充其選應令該學政於試
列前茅之士舉其文行兼優才品出衆者會同該督
撫秉公掄採至庠序為陶育人才根本今教職率多
昏髦龍鍾濫竽戀棧雖定以六年甄別而上官以閑
曹多方寬假非國家設官敷教本意應分以年限詳

加澄汰所遺員缺即以應授教職之選拔充補於士
風當有裨益所有選拔貢生赴部驗到作何定限及
朝考錄用一切規條俱應詳悉酌定永著為令大學
士九卿集議以聞尋議令直省學政於歲科兩試時
凡文理優通之廩增附生觀其才品接其言論合
之文章已得其大概至考校時屢次優等及見列
前茅之士擇其文優品端者秉公選拔即隨場咨
明督撫存案俟科考事竣八月鄉試以前學政傳

齊通省選拔之生會同督撫通行覆試驗看給與
貢單咨文赴部仍將正覆原卷送部磨勘再順天
學政選拔滿洲蒙古漢軍生員應於鄉試前奏請
欽命大臣會同覆試驗看奉天由府丞選拔應會同府
尹覆試驗看福建臺灣府由臺灣道選拔移送福
建學政會同督撫覆試驗看倘驗覆不堪充選仍
發回原學肄業至到部之期統以其年十月起限
四川廣東廣西雲南貴州定限八月於次年五月

到部江西福建浙江湖北湖南陝西限六月於次
年三月到部直隸奉天河南山東山西江南限四
月於次年正月到部禮部即照定限奏請

欽命大臣於

午門內考試分列三等進

呈如有文理荒謬不入等者學政照例議處督撫亦一
併議處至

朝考取列優等者九卿簡選引

見候

旨分別錄用再直省府州縣教職飭令督撫三年一次
澄汰將實在年力就衰者勒令休致澄汰員缺即
以簡選引

見之拔貢充補未入簡選者仍劄監肄業從之

十七年定學政學錄得升補助教官其錄正學錄
缺出以吏部記名人員補用

定四川成都華陽二縣學廩生出貢例三年內兩

縣輪貢一人

停止八旗世爵子弟附入官學肄業時以八旗世爵既於兩翼設立官學將見在八旗官學肄業者咨回各旗所有八旗官學增設之漢教習一人裁去教射教習亦咨回本旗行走

十八年考試滿洲助教

十九年揀選浙江等省拔貢生

命國子監學正學錄等官照內閣中書例考試從御史

陳大化請也

命甘肅等省選拔貢生送熱河引見先是禮部奏准直
省選拔貢生赴部驗到

朝考引

見錄用規條內有遇

皇上行幸熱河所有考試

欽命四書論判題各一道請照乾隆十七年會試在京

總理事務處請

旨頒發題目并試卷免進

呈之例由總理處請題令閱卷大臣祇領考試分別
等第具摺奏

聞其一二等照例奏派九卿揀選恭候

聖駕回鑾帶領引

見至是應考甘肅川廣雲貴等省拔貢適遇

皇上由熱河啟

鑾木蘭奉

諭此次考試甘肅等省拔貢若俟至回鑾後帶領引見
未免守候需時著交在京總理王大臣等驗看揀選
其應行引見者即送至熱河行在帶領行見

定進士舉人考補學正學錄官例

二十年平定伊犁大功告成

御製碑文勒石太學

文曰遼矣山戎薰粥旃裘毳幕之人界以龍沙畜其驪
奚雖無恒業厥有分部蓋自元黃剖判萬物芸生東

夷西夷各依其地謬舉淳維未為理據皇古莫紀其
見之書史者自周宣太原之伐秦政亘海之築莫不
畏其侵軼猾夏是虞自時厥後一二奮發之君慨然
思挫其鋒而納之宥然事不中機材不副用加以地
遠無定處故嘗勞衆費財十損一得縉紳之儒守和
親介冑之士言征伐征伐則民力竭和親則國威喪
於是有守在四夷羈縻不絕地不可耕民不可臣之
言興矣然此以論漢唐宋明之中夏而非謂我皇清

之中夏也皇清荷

天之龍興東海撫華區有元之裔久屬版章歲朝貢從征
狩執役維謹準噶爾厄魯特者本有元之臣僕叛出
據海西終明世為邊患至噶爾丹而稍強吞噬鄰番
闌入北塞我

皇祖三臨朔漠用大破其師元惡伏冥誅脅從遠遯迹毋
俾遺種於我喀爾喀厥侄策妄阿拉布坦收其遺孽
僅保伊犁故嘗索俘取地無敢不共逮夫部落滋聚

乃以計襲哈密入西藏準夷之勢於是而復張

兩朝命將問罪雖屢獲捷而庚戌之後逆子噶爾丹策凌能用其父舊人乘我師怠掠畜於巴里坤擣營於和卜多於是而準夷之勢大張然地既險遠主客異焉此勞往而無利彼亦如之故額爾德尼招之敗彼亦以彼貪利而深入也

皇考謂我武既揚不可以既允其請和以息我衆予小子敬奉

先志無越思焉既而噶爾丹策凌死子策妄多爾濟郡木
扎爾暴殘喇嘛達爾扎篡奪之達瓦齊又篡奪喇嘛
達爾扎而酗酒虐下尤甚焉癸酉冬都爾伯特台吉
策凌等率數萬人來歸越明年秋輝特台吉阿睦爾
撒納和碩特台吉班珠爾又率數萬人來歸朕謂來
者不可以不撫而撫之莫若因其地其俗而善循之
且毋令滋方來之患於我喀爾喀也於是議進兩路
之師問彼罪魁安我新附凡運餉籌馱長行利戰之

事悉備議之始熟經於庚戌之艱者咸懼蹈轍惟大學士忠勇公傳恒見與朕同而新附諸台吉則求之甚力朕謂犁庭掃穴即不敢必然喀爾喀之地必不可以久居若而人毋寧用其鋒而觀厥成即不如志亦非所悔也故凡

禡旗命將之典槩未舉行亦云偏師嘗試為之耳塞上用兵必以秋而阿睦爾撒納禡木特請以春月欲乘彼馬未肥則不能遜朕謂其言良當遂從之北路以

二月丙辰西路以二月己巳各起行哈密瀚海向無
雨今春乃大雨咸以為時雨之師入賊境凡所過之
鄂拓克携羊酒糗糒迎恐後五月乙亥至伊犁亦如
之達瓦齊於格登山麓結營以待兵近萬我兩將軍
議以兵取則傷彼必衆彼衆皆我衆多傷非所以體
上慈也丁亥遣阿玉錫等二十五人夜斫營覘賊向
賊兵大潰相蹂躪死者不可勝數來降者七千餘我
二十五人無一人受傷者達瓦齊以百餘騎竄六月

庚戌回人阿奇木霍集斯伯克執達瓦齊來獻軍門
準噶爾平是役也定議不過二人籌事不過一年兵
行不過五月無亡矢遺鏃之費大勲以集遐壤以定
豈人力哉

天也然

天垂佑而授之事機設不奉行之以致坐失者多矣可與
樂成不可與謀始亦謂蚩蚩之衆云爾豈其卿大夫
之謂既克集事則又曰苟知其易將勸為之夫明於

事後者必將昧於幾先朕用是寒心且準噶爾一小部落耳一二有能為之長而其樹也固焉一二暴失德之長而其亡也忽焉朕用是知懼武成而勒碑

文廟例也禮臣以為請故據實事書之其辭曰茫茫伊犁大幹之西匪今伊昔化外羈縻條支之東大宛以南隨畜獵獸蟻聚狼貪乃世其惡乃恃其遠或激或攻而乘我緩其計在斯其長可窮止戈靖邊化日薰風不侵不距不來其那款闕求市亦不禁訶始慕

希珍終居奇貨吏喜無事遷就斯悞漸不可長我豈
懼其豈如宋明和市之為既知其然飭我邊吏弗縱
弗嚴示之節制不仁之守再世斯斬篡奪相仍飄忽
荏苒風沙革面煎鞏披忱集泮飛鶚食黠懷音錫之
爵位榮以華裾膝前面請願効前驅兵分兩路雪甲
霜鋒先導中堅如鼉錯攻益以後勁蒙古後屬八旗
子弟其心允篤二月卜吉牙旗飄飄我騎斯騰無待
折膠泉湧於磧蕪茁於路我衆歡躍謂有天助匪雷

我衆新附亦云黃髮未覩水草富春烏魯木齊波羅
塔拉台吉宰桑紛紛款納牽其肥羊及馬潼酒獻其
屠者合掌雙手予有前諭所禁侵陵以茶交易大愉
衆情衆情既愉來者日繼蠢達瓦齊擁兵自衛依山
據淖惟旦夕延有近萬人其心十千勇不目逃擒二
十五曰阿玉錫率性賊所銜枚夜襲直入其郭揮矛
拍馬大聲疾呼彼人既離我志斯合突將無前縱橫
鞭鞞索角鹿唾隴種東籠自相狼藉孰敢攫鋒狐竄

鼠逃將往異域回部遮之兇渠斯得露布既至告

廟受俘凡此歲功荷

天之衢在古周宣二年乙亥淮夷是平常武詩載越我

皇祖征噶爾丹命將

禡旗亦乙亥年既符歲德允協師貞兵不血刃漠無王
庭昔時準夷弗恭弗諠今隨師行為師侯爵昔時準
夷日戰夜征今也偃卧知樂人生曰匪準夷曰我臣
僕自今伊始安爾游牧爾牧爾耕爾長孫子曰無向

非豈有今是

兩朝志竟億載基成側席不遑保泰持盈

恩詔國子監貢生監生及官學教習免坐監一月

二十一年定湖南衡陽新分設縣學出貢例兩學

二年輪貢一人

二十二年禮部議順天府尹劉綸等奏大宛兩縣

冒籍貢監限滿不行自首請概行斥革并請將來

先取本縣印結始准報捐查兩縣貢監地方官並

不故意清查至限期將滿概請斥革殊未允協應
令府尹督率兩縣詳查如果踰限無踪再行照例
斥革至其具結始行報捐之處徒啟需索之弊均
毋庸議一疏奉

諭旨依議此等捐納貢監其因應試投捐者乃圖獵取
功名冒占試額自當從嚴辦理然例由國子監分堂
肄業或由學政錄科其為數不過數百人年貌語音
不難立辨嗣後應專其責成務令於肄業錄科時嚴

加察驗以杜假冒倘仍前濫行收考一經發覺必將錄送各官嚴加議處至不應試之貢監第希頂帶之榮或由以捐納官職自與占冒科名有關政體者殊異若必如前議限年令自改籍不皆改籍者又皆斥革及如該府尹所奏由該縣具結赴部始准收捐轉致胥役藉端需索種種過甚無如聽其投捐為便

定考拔貢生試題例舊例考試拔貢第一場四書題文二經文一第二場時務策一論一判一至是

禮部議准御史陳大復條奏改判為五言八韻詩一首

朝考拔貢亦試以書藝一詩一著為例

二十三年定優生到部嚴加考試例試以書藝一詩一分別等第進

呈其文理明通者照例劄監肄業荒疎者發回原學併將該學政議處

定考試優生不拘人數之例定例考試各省優生

俟到部有四五名始行考試至是優生有於上年
五六月間到京因人數不足以致守候日久艱於
旅食者兵部侍郎兼管監事觀保奏請照考試續
到拔貢不拘人數之例一體辦理或遇有拔貢續
到亦可一同考試從之

二十四年停止捐納貢監歸教官約束例舊例捐
納貢監統歸地方官約束嗣因各省貢監不受學
臣約束妄自尊大部議准令督撫學臣轉飭州縣

會同教官將所屬貢監生員例一併歸學舉報
優劣嚴加約束至是安徽學政劉墉奏捐納貢監
與生員迥不相侔責成教官約束向例由州縣造
冊移咨教官在州縣既覺繁瑣在教官不能綜覈
一柄兩操不但有名無實抑且體制不符應請傳
止部議應如所請從之

十一月平定回部大功告成

御製碑文勒石太學

文曰建非常之功者以舉非常之事舉非常之事者以藉非常之人然亦有不藉非常之人而舉非常之事終建非常之功者則賴

昊蒼篤貺神運幹旋事若禍而轉福機似逆而轉順順

天者昌逆

天者亡故犁隼夷之庭掃回部之穴五年之間兩勲並集始遲疑猶未敢信終劼劬以底有成荷

天之龍在茲畏

天之鑒益在茲爰叙其事如左達瓦齊之就俘也伊犁已
大定矣無何而阿睦爾撒納叛彼其志本欲藉我力
以成已事時也人心未定佐饗者嘗一蟻肆狂萬狙
應響蜂屯蟻雜不可爬梳畏難者羣謂不出所料準
夷終不可取並有欲棄巴里坤為退守謀然予計其
衆志不齊將有歸正倒戈者於是督策將帥之臣整
師亟進既而伊犁諸台吉宰桑果悔過勤王思討逆
賊以自贖此

天恩助順者一也二酋大小和卓木者以回部望族久為
準噶爾所拘於阿巴噶斯鄂拓者也我師既定伊犁
乃釋其囚以兵送大和卓木波羅泥都歸葉爾奇木
俾統其舊屬而令小和卓木霍集占居於伊犁撫其
在伊犁衆回乃小和卓木助阿逆攻勤王之台吉宰
桑等阿逆賴以苟延及我師再入阿逆遂逃入哈薩
克而霍集占亦即收其餘衆竄歸舊穴此

天恩助順者二也準夷之事前紀畧見梗概茲不復紀紀

興師討徊之由則以我將軍兆惠在伊犁時曾遣副都統阿敏道往徊議事小和卓木乃以計誘阿敏道而拘之及我師抵庫車問罪彼携阿敏道以來援至中途害之及從行者百人彼猶逞其狂悖抗我師顏且敢冒死入庫車城乃雅爾哈善畧無紀律致彼出入自由然我滿洲索倫衆兵士無不念國家之恩効疆場之力故能以少勝衆逆渠懼而免脫此

天恩助順者三也知債轅之無濟掄幹材之可任時將軍

兆惠以搜勦準夷餘黨至布露特部落已款服其衆
因命旋師定回部於是克庫車存沙雅爾定阿克蘇
略烏什收和闐師之所至降者望風直至葉爾奇木
城下而我軍人馬周行萬有餘里亦猶強弩之末矣
二酋以其逸待之力統數萬人與我三千餘人戰我
師之過河者纔四百餘猶能斬將奪旗退而築堡黑
水固守以待此

天恩助順者四也萬里之外抱水救火其曷能濟乃予以

去年六月即降旨派兵撥馬欲以更易久在行間者耳故兵馬率早在途一趨進而各爭前恐後人人有敵愾之憤此

天恩助順者五也副將軍富德及參贊舒赫德輩率師進援以速行戈壁中馬力復疲值狂猊據險坐俟頗有難進之勢夫援軍不能進則固守以待者危矣而參贊阿里衮驅後陣之馬適至夜擣賊營我師內外夾攻彼不知我軍凡有幾萬握炭流湯之徒自相蹂躪

顧命不暇於是解黑水之圍鹿駭羣驚遁而保窟我之兩軍合隊全旅以迴阿克蘇此

天恩助順者六也既而彼料我必再入泰山之壓難當乃於我師未進之先携其部落載其重器跳而遠去而葉爾奇木哈什哈爾二城之舊伯克等遂獻城以降參贊明瑞一邀之於霍斯庫魯克副將軍富德再陷之於阿爾楚爾於是離心者面內前途者反旆二酋唯罕其妻孥及舊僕僅三百人入拔達克山境此

天恩助順者七也人迹不通之地語言不同之國既已雀
毆寧不狼顧其授我與否固未可定也然一聞將軍
之檄莫不援旗請奮整旅前遮遂得允渠函首露布
遥傳此

天恩助順者八也夷考西師之後非予夙願之圖何則實
以國家幅員不為不廣屬國不為不多惟厯守成之
志無希開創之名兼以承平日久人習於逸既無非
常之人安能舉非常之事而建非常之功哉然而輟

轉輻輳每以艱而獲易視若失而反得故自締始以
逮定功雖予自問亦將有所不解其故而不敢期其
必然者故曰非人力也

天也夫

天如是顯佑國家者以

祖宗之敬

天愛民蒙

眷顧者深也則我後世子孫其何以心

上蒼之心志

列祖之志勉繼繩於有永保丕基於無窮乎繫以銘曰二
酋偕德始亂為賊是興王師報怨以直伊犁既平叢
爾奚屑徐議耕闢徐議戍設以噢以咻伊余本懷豈
其勿戢圖彼藐徇彼徇不量怒臂當車戕我王臣助
彼狂狙始攻庫車憤轅敗事用人弗當至今為愧悖
逆罪重我武宜揚易將整師直壓彼疆阿蘇烏什玉
隴和闐傳檄以定肉袒羊牽二酋孽深知不可活狼

須相顧固守其穴桓桓我師周行萬里馬不進焉強
弩末矣以四百人戰萬餘虜退猶能守黑水築堡間
信達都為之傷悼所幸後軍早行在道督勅速援人
同怒心曾不兩月賊境逼臨賊境逼臨彼復徼隙馬
繼以進賊營夜斫出其不意賊乃大驚謂自天降孰
敢鋒撓大縣大膊如虎搏兔棄角隴種誰敢回顧黑
水圍解合軍暫旋整旅三路期並進焉賊偵軍威信
不可支挈其妻孥遁投所依所依亦回豈不自謀豈

伊庇猿而受林憂利厥錙重無遺盡掠遣其都九遂
來獻馘詎惟獻馘並以稱臣捧賚表章將詣都門奏
凱班師前歌後舞尸逐染鍰溫禺釁鼓露布至都正
逮初陽

慈寧稱慶亞歲迎祥

郊廟告成諸典並舉皇皇太學豐碑再樹豐碑再樹敢予
喜功用不得已

天眷屢蒙始之以武終之以文勘亂惟義撫衆惟仁布惠

施恩寰宇共喜古不羈縻今為臣子疆闢二萬兵出
五年據實書事永矢乾乾

二十五年定江南金山衛學出貢例三年貢一人
定湖南永綏廳學出貢例十年後四年貢一人

考試國子監助教

考試國子監教習

二十六年

恩詔直省儒學以正貢作恩貢次貢作歲貢

二十七年定貴州荔波縣學出貢例四年一貢

定四川茂州等學出貢例茂州二年一貢松潘越
雋三年一貢資州眉州俟六年後三年兩貢新寧
梁山三年輪貢一人

二十九年定四川嘉定潼川二府樂山三臺二縣
學出貢例俱二年貢一人

三十年更定四川夔州府歲貢例照州學例三年
二貢

增派蒙古大臣一員兼管祭酒教訓蒙古學生

皇朝文獻通考卷六十七

欽定四庫全書

皇朝文獻通考卷六十八

學校考

六

太學

四

乾隆三十一年又改定考試教習書題二道為一

道增試五言排律八韻例

詳見旗學門

又申定增設八旗官學滿洲教習一員裁漢教習

一員

詳見旗學門

嚴申送歲貢入監肄業例

詳見直省鄉黨門

三十三年

頌

孔廟門題殿榜

諭修葺文廟現屆落成太學規模式昭輪奐惟門題殿榜尚應詳考彙章用肅景仰向來正殿稱先師廟二門曰廟門而大門未有書額蓋沿習明代舊文未加釐正夫廟門之號於禮經所稱祖廟既涉嫌疑而先

師廟額揭諸殿楹名實尤多未稱應於大門增先師
廟額其正殿改為大成殿二門改為大成門庶符會
典定制朕親書榜字涓吉恭懸以彰崇道尊師之至
意

三十三年禮部議貢監內有年老癯疾情願繳照
不換者照生員告衿之例准其仍帶原頂應於執
照繳銷之時即在季報四柱冊內註明緣由下季
毋庸造報以省案牘從之

三十四年

御製重修文廟碑記

舉江淮河濟以贊海吾知其不知海舉嵩岱恒華以
贊地吾知其不知地然則舉道德仁義以贊孔子者
其亦類於是乎夫江淮河濟豈不為海所納而不足
以形海之大然海固不拒江淮河濟以為水也嵩岱
恒華豈不為地所載而不足以究地之厚然地固不
讓嵩岱恒華以為土也道德仁義豈不為孔子所垂

而不足以盡孔子之量然孔子固不外道德仁義以
為教也教之義始見於虞書而未有定所夏校殷序
周庠學則三代共之是國學所昉乎夫三代既有學
亦必有教而吾以為孔子立道德仁義之教者何蓋
三代以前之教非孔子不明三代以後之教非孔子
不垂也國學始於元太祖置宣聖廟於燕京由元及
明代有損益至本朝而崇奉規模為大備

列聖右文臨雍必事輪奐乾隆戊午朕詣學展儀先詔易

蓋黃瓦聿昭茂典然丹雘雖致飾壯觀而上棟下宇
風雨燥濕歷年既久浸歊是虞爰以歲丁亥發帑二
十餘萬特簡重臣司其事越己丑仲春告歲工朕親
釋奠以落成焉先是言臣有以宜乘此時修復辟雍
圜水之制為請者禮官以為三代之制弗相沿襲實
政不必泥古朕以其言良是遂從之門殿諸額一準
會典皆親書各懸於其所舉大功者必勒碑以誌故
叙其事書之若夫述孔子之言仍以頌孔子是猶繪

日月星辰以象天朕有所不能

諭向來各省學政三年任滿例應舉報優劣其優生之
保題到部者經禮部彙試分別廩增附作貢監送入
成均肄業且有按省大小定額不得過幾名之令而
日久相沿奉行殊難責實在學政中之拘謹畏事者
多以無可舉為辭人才既不無屈抑其他好名市惠
之人雖所舉不敢踰額必致儘數充選自博寬厚之
譽況學政與生員分屬師生隨時得以相見其中保

無納贄資緣情弊於造士掄才甚有關係但三年舉行一次為獎勵士子之一端若竟輟而不行未免因噎廢食嗣後學政舉報優生照選拔貢生之例會同該督撫一體考核果屬文行兼優者准其會銜保題庶諸生不得濫邀而甄拔益昭公當其報劣之例照舊核實辦理

吏部覆准管國子監事侍郎德保奏准學正學錄例應推陞各衙門典簿司務等官其有文理優長

訓課有方者或遇推陞准奏明請

旨留監俟助教缺出照例題補從之

管國子監事侍郎德保奏請本監滿漢博士助教及學正學錄等官有文理荒疎而年力未衰尚堪辦事者咨行吏部准其以對品官調補從之

更定泰州學出貢泰州本三年兩貢嗣以額設廩增將十名分撥東臺縣因改為二年一貢

三十五年更定四川綿州學歲貢生三年兩貢彰

明德陽二縣學四年一貢

三十六年更定雲南元江州廣西州歲貢生各三年二貢普洱府二年一貢武雲州三年二貢祿勸縣二年一貢鶴慶府三年二貢彌勒師宗建水三縣各二年一貢順寧府三年二貢麗江府學二年一貢順寧麗江二縣學四年一貢

是年恭上

皇太后徽號

恩詔國子監貢監生及各官學教習俱免坐監期一月
令各省儒學以正貢作恩貢以次貢作歲貢

三十九年四庫全書處奏准永樂大典內採輯散
篇成部有可刊行之書擬於國子監揀派內肄業
貢生十名到

武英殿照現在行走貢生例專供校錄刊本之用得
旨允行

三十九年增定浙江海寧州學出貢例三年兩貢

又定福建古田縣學歲貢生三年一貢屏南縣學
四年一貢

四十一年建立熱河學宮定熱河等七廳以開考
年計算俟十二年後始行出貢照例三年一貢遇
拔貢年拔取一名

又定懷仁縣學出貢例四年一貢拔貢年拔貢一
名

禮部奏准廩生出貢各該學政於考准之日當堂

填給貢單令其收執其赴監肄業者仍取本籍地方官文結并親齎貢單投驗倘無單呈驗除駁回外將遺漏給單之該學政叅處至現在肄業及續來之歲貢生內如出貢在乾隆四十年以前未經給有貢單者由國子監核驗本籍文結再咨查禮部俟准部覆貢冊有名仍准其肄業報滿咨部銓選毋庸補給貢單以歸簡易從之

禮部議准順天各屬考貢諸生距考棚在五百里

以內者以十月為限其在五百里以外者以一年為限如逾限不行投考即將該生應貢之處永行扣除其赴考以前有實在患病事故者由該教官具結報明暫行轉限不得過三個月仍於冊內聲明報部所有現在應貢之生即照新定章程辦理並通行各省學政一體遵照從之

平定兩金川大功告成恭上

皇太后徽號

恩詔國子監貢監生及各官學教習俱免坐監期一月
平定兩金川大功告成

御製碑文勒石太學

太上立德其次立功又其次為立言而德與功皆賴
言以傳言之無文行而不遠文之時義大矣哉然傳
德之辭直而寡傳功之辭費而多直而寡者不因文
而德自見二典三謨經世立教是也費而多者必因
文而功乃明周誥殷盤佶屈聱牙是也吾嘗讀韓昌

黎平淮西碑益悉此言之不爽何則彼其藩鎮乃家
奴之類慙慙因循以致宛成敵國削而平之是宜引
以為愧而不可炫以為功賴昌黎之文幾與江漢常
武同稱者定然有識者固知其辭費而多飾而未知
憲宗之愧與弗愧耳今之平定金川之文不有類於
斯乎解之者曰逆酋羈縻徼外非若淮蔡之居中土
元濟之為世臣也吾則以為既受職為土司則是我
臣而其地近接成都遠連衛藏則是我土我土我臣

而橫生逆志蠶食鄰封將欲大有所為弗勦而滅之
則西川將不能安枕茲雖歲事與平定淮蔡擒吳元
濟何以異故宜引以為愧而不可炫以為功者以此
金川之始見於己巳告功之文茲不複記記其復叛
而復征則其陰謀負恩已自戊寅年始蓋戊辰之師
實緣其跳梁不靖而師既臨境彼即窮蹙乞降遂以
赦罪班師甫十年而其酋郎卡即與華布什咱構釁
又四年遂與緯斯甲布及三雜谷為敵而逆子索諾

木凶悖益甚自恃地廣人衆力强與各土司構兵訖
無寧歲故各土司皆畏之如虎而以勢分力散又莫
能如之何余以為業已受其降不宜復加兵且蟻鬪
蠻觸不足以勞王師因命地方文武大吏隨宜彈壓
令弗越內地界亦足以安民而示度耳不虞地方大
吏欲息事而每示寬逆酋轉以為無足懼而日益逞
其小金川逆酋僧格桑者始則與索諾木水火相仇
繼乃狼狽為奸於是索諾木計殺革布什咱土司色

楞敦多布取其印勅以歸而僧格桑亦侵佔鄂克什地界且發兵圍其土司色達拉之官寨期於必取總督阿爾泰提督董天弼知事不可掩乃有發兵之請是役也或咎阿爾泰依違誤事之過而余則以為阿爾泰之過皆余之過蓋金川因其地險衆悍久蓄異

志是以有殺至維州橋之謠

維州本漢徼外羌冉駹地蜀將姜維征羌駐此

築壘後因名姜維城唐武德初因其地置維州屢叛屢復廣德中陷土蕃號為無憂城遂屢入寇授大中時始復內附五代蜀州內徙改縣曰保寧宋景德初改曰威州元至元間以州治保寧縣并入明洪武初

於州境析置保縣
本朝雍正五年省威州入保縣
屬茂州今其地尚有維州橋之稱而促浸番人以殺

至維州橋播為謡曲似係
聞土蕃舊事妄冀效尤耳
則其不忘內地情率可知

戊辰之役我師深入屢勝即不宜赦其罪而受其降

此一誤也甫十年而郎卡背恩作亂以及逆子踵其

蹟皆不及發兵問罪惟令地方大吏隨宜處置又屢

誤也以至尾大不掉終於興師故予不咎人之議為

窮兵黷武而轉咎己之類於姑息養奸蓋中國之制

外域張撻伐則彼畏而歛跡主和好則彼輕而生心

漢唐宋明之覆轍率可按也若謂予窮兵黷武則予
賴

天恩平伊犁定回部拓疆二萬餘里豈其尚不知止足而
欲滅叢爾之金川以為揚赫濯紀勲烈之圖哉雖然
平伊犁定回部其事大矣然費帑不及三千萬成功
不過五年茲兩金川小寇地不逾千餘里人不滿三
萬戶而費帑至七千萬成功亦遲至五年則以跬步
皆險番奴效命死守故能延至今日而我將軍阿桂

立志堅定決機明敏兩副將軍及參贊領隊諸臣同心合力各軍士敵愾奮勇凡經大小數百餘戰而後成功視平伊犁定回部費力轉不啻倍蓰設非

天恩助順衆志成城則金川未易言滅而國威或致少損矣是不可以不記觀斯文者尚諒予懷慚悔過之不足知非稱功詡德而為言其庶幾乎繫之以辭用誌始末云爾

小金首禍曰僧格桑兵救鄂什

向稱沃日今定為鄂克什急呼之則鄂什

也竟抗顏行

僧格桑於庚寅夏與鄂克什土司構怨稱兵阿爾泰董天弼親往試諭泰稱逆

苗逆教退歸亦遂釋而不問未數月復圍鄂克什辛卯夏阿爾泰乃遣兵護鄂克什而逆苗遂與官兵交

戰

督臣提臣每事遷就知弗勝任將軍別授

阿爾泰等名為

進兵仍思遷就完事因諭溫福由滇赴川經理軍務且命桂林馳往視之辛卯冬因阿爾泰始終遲疑玩誤遂罷其職而以溫福代為大學士授定遠將軍由西路督兵進攻其四川總督則令桂林代之統兵攻

勦南路

攻破巴朗

向訛為斑瀾山今改

直取達圍進抵資哩數月

克之兩路夾擊遂得美諾鼠竄狼奔金川助惡

溫福初至

西路即策勵將士攻克巴朗拉乘勝直取達圍進攻資哩數月而克之繼命豐昇額為副將軍同溫福進

勦賊尋還木蘭壩我兵進抵路頂宗桂林在南路
其始頗合機宜連破約咱卡了諸寨並復革布什咱
侵地尋為宋元俊所誤致有墨壘溝之失桂林匪不
上聞為阿爾泰所劾因即罷斥而令阿桂為副將軍
赴南路代領其兵南路自達烏至僧格宗皆峭壁懸
崖礮卡林立阿桂董飭官軍勵勇推堅深入其阻乘
勝進擒美諾賊營壬辰十一月遂克之溫福亦攻克
明郭宗至美諾與阿桂會復督兵攻取布朗郭宗逆
酋自僻徑竄入金川擒其父澤旺解京仍傳檄撫定
汗牛大板昭等寨落小金川悉平而金川逆酋索諾
木復散黨惡拒命
因移兵並討之
既平趨拉小金川者語本名遂討促侵金

川省雪多境險奏功以沈奏功以沈賊更遮却綠營

怯懦遇戰辟易

攻勦泥漫之兵溫福由功噶爾拉阿桂由雷噶爾拉分兩路並進功噶之

前為卡撒了口賊築壘斷徑不能進遂別由昔嶺統
攻而礮堅地險策多雨雪攻之半年雖屢得賊卡終
未扼其要害綠旗兵既懦蕙溫福又不善調度以二
萬餘人散布各卡防守遂以分而見單賊窺其勢隙
於癸巳六月遣耆衆數百由間道潛出煽誘趙拉降
耆復叛並天洞肅懦失守為賊所戕賊益猖獗授溫
福後路直侵大營綠營兵衆先潰將領戰沒者多溫
福率親兵與賊搏戰亦遇害趙拉之地復失逆耆等
罪大惡極愈
不可寬矣 兵既無能將亦失算豈如南路全師而

返叶

木果

阿桂在當噶軍律明而士心固賊不敢犯然
木有事之後當噶亦難獨駐遂飭勵兵衆由

南路全
師而歸

重調勁旅吉林索倫健銳火器其心忠純

已前

簡派八旗兵三千令赴川助勦為溫福等奏止使木
果木軍營有滿洲兵在彼則綠營得所依恃亦不致

倉皇潰竄是其事仍由溫福自張幸阿桂一路軍氣甚整即授為定西將軍並選健銳火龍營兵三千吉林索倫黑龍江兵四千迅赴軍營重籌進剿仍分兩路堂堂正正不旬日

間美諾重定

癸巳冬將軍阿桂統兵由西路進攻其南路則令明亮為副將軍進剿兩路並

進所向克捷旬日之間即收復小金川全部

谷噶既入馬尼

去聲

並克泰養

旗兵允得其力

阿桂等於甲午正月搶佔谷噶了口山梁明亮等亦於是時攻克馬尼兩

路之兵皆因有八旗勁旅奮勇先登綠營觀感激勸皆效法恐後奏績甚速

驪三路進一

阻宜喜及彼緘布遇險而止

副將軍豐昇額同舒常於宜喜駐兵與阿桂明

亮共成三路第宜喜之兵攻勦半載未能寸進而明亮則由馬尼攻得木龜卡卡角及抵庚額特亦阻險

而未能進遂
駐絨布寨

阿桂西路則屢建功羅博湖普建遜克

宗

甲午三月阿桂攻克羅博瓦山梁六月攻克色湖
普比諸寨並峰峻碉堅賊衆悉力死守官軍皆涉

險銳攻殲醜甚衆
遂臨遜克爾宗

喇穆山梁日則了口舉默格爾以

擾其後

我兵攻克色湖普後賊衆防守益力阿桂偵
知喇穆喇穆迤西岑崖陡削賊備禦稍疎因

分兵起越進攻盡據其碉並攻克日則了口亦六月
中事其後兵進稍阻至十月初復繞道攻得默格爾

山梁其榮噶爾博日爾
八噶噶之賊皆裁於後

明亮宜喜亦據嶺梁而復難

進徒然望洋

宜喜為賊要隘守禦極嚴豐昇額舒常
攻之一年未下繼而命豐昇額改赴西

路舒常在彼更不能進甲午夏因明亮在賊布屢攻
未進不宜頓兵於無用之地令其分兵七千移攻正

地明亮遣偵卒往探不見賊蹤難以輕進亦赴西路
協勦阿桂扎止之會綽斯甲布土司懇明亮駐宜喜
并願效前驅明亮乃出其不意分兵冒雨直進遂據
宜喜山梁並攻得俄坡格勒古賊因掘濠斷路明亮
等復為逮昨乙未畧康薩爾木斯工噶賊碉並毀

阿桂

自攻得黑格爾欲乘勝直進賊復於康薩爾山梁抗
拒兩月餘乙未正月阿桂派兵分路前進拔其鹿角
連起重濠躍上碉頂遂毀其碉賊甚東四月明亮
復攻得木思工噶克了口從此下壓勢益甚矣

明亮

河西亦有所據日旁以前五十里路

明亮因達爾圖之路為賊所斷

商之阿桂謂當仍由宜喜一路進攻並派西路兵一
千令福康安帶往攻克甲索碉卡海蘭察亦往會攻
合力并擊先克撒撒谷其日旁右之沙壩山並達爾
圖得楞及溝內之斯年木咱爾各賊皆紛紛棄碉遁

周圍五十餘里
寨落悉行焚燒
夾河兩軍聲息可通並清後路遜克

爾宗

五月中明亮攻克額爾替碉卡可下至平坡六月間復攻克石真噶寨阿桂派兵沿河從赤爾

寨攻打隔河之沙爾尼一帶兩岸夾擊聲息可通迨阿桂攻得噶爾丹喇嘛寺等處居高得勢以遜克爾

宗在我兵之後留之非計遂派兵三路分進豐昇額督率攻勦或斫寨而入或梯牆而進遂得其碉殺賊

無算後路益肅清矣

舊則大海昆色拉枯層層破要步步披嶮

阿桂以昆色爾喇嘛寺在拉枯喇嘛寺之上於此路尤為扼要其舊則大海亦當並勦分派將領統兵同

往其昆色爾山梁最險官兵皆蟻附上攻佔其碉寨復縱火焚燒拉枯喇嘛寺又攻得舊則大海官兵無

不超越而入

遂克勒圍紅旗飛遞而何四月大捷未

至既克西里乃若建瓴科布

曲

索隆

古

不日而傾

阿桂

於八月十五夜攻克勒烏圍其附近碉卡木城六十餘處一夕無不摧破八日而紅旗述至木蘭詳見聞捷凱歌及誌事詩自奏捷後四閱月雖時有克獲未能深入直至十一月初攻克西里軍聲愈壯而賊勢愈感尋即攻得科布曲索隆古山梁並克格隆古兜窩等要隘又掃清安布魯木一帶並據建瓴之勢矣

雍中舍齊易如拉朽密圍噶喇

依

賊其奚走

阿桂

既

古進攻朗阿古則朗噶克丁口等處皆克之並據噶古山梁十二月十七日遂由瑪爾古當噶一帶寨落悉行掃蕩並克舍齊喇嘛寺次日復攻克雍中喇嘛寺即於十九日統兵直搗噶喇依四面圍攻水陸俱斷促浸番衆自攻克勒烏圍以來大小男婦紛紛投由其大頭人布籠普阿納木達什阿庫魯等遂皆相

率乞降並索諾木之母阿倉姑阿青及其姊妹亦皆
投至軍營僉云索諾木莎羅奔兄弟并作惡之大頭
人丹巴爾雅爾等皆在園中此蓋逆苗賊黨等是時
罪孽深重天奪其魄驅之一處以就擒也是時

河西明亮亦入富德馬邦傳檄芥拾

明亮既克阿爾古等寨克取獨

古木開通乃當山梁並擄甲雜掃獨松河西一帶悉
行勦洗過河會阿桂合攻賊巢富德亦將河南北之
噶咱普庚額特曾達等各寨落全行掃清直據馬爾
邦亦遣兵與阿桂會富德所得之地俱不煩兵力易
如拾
設非西路圍噶喇依則其兩路亦無進期明亮

西路向皆難於攻取而富德久駐絨布尤未能寸進
自阿桂既克索隆古乘勝席捲已圍噶喇依各處之
賊皆膽破心散望風潰降非果由力戰而得若非西
路官兵直擄賊巢則明亮富德兩路仍未有進取之

期也諸軍既合火攻周遭雖據三穴訖其奚逃然猶死

守四十餘日計窮力竭乞命而出

官兵四面合圍賊猶負隅力抗繼用

大礮環轟摧其礮卡將士等乘勢克取旁近寨落層層進逼殲賊日多逆酋惶懼遣其兄岡達克彭楚克次第詣營並即拘繫於是攻圍益急據其近礮斷其水道索諾木窘迫無計遂於二月初四日早率其兄弟莎羅奔甲爾瓦沃雅爾斯丹巴并兩王婦及黨惡大頭人丹巴沃雅爾斯丹巴魯緯寓斯甲尼瑪噶喇克巴並兩喇嘛等大小頭目男婦二千餘人出寨逆首跪捧印信乞免誅戮因即悉就擒獲俘獻京師自國勸以來計四十餘日至是全境蕩平罪人斯得紅旗於二月十二日馳至桃花寺行宮適當告功

東陵之期此實仰賴

論將軍阿桂等既成功將士

皇祖默佑益深感戴隨日凱旋俟東巡回蹕

至黃新莊舉行郊勞大典以昭僎武策勲之盛金川之功阿桂居首特恩異

數加之宜厚

征勦金川之後實由將軍阿桂蓋誠體國不憚艱勞制勝運籌克成偉績實為

此事首功特封為頭等誠謀英勇公加賞雙眼花翎紅寶石帽頂四團龍補褂金黃帶紫轡以昭崇獎

能出能入有權有經運長擊短後實先聲金川之功

允資羣力寸步層峯冰滑石仄將軍指揮無不奮勇

以此破敵鹿埕隴種金川之功非予所期事弗可已

久而得之闢猶獸困捨懲難助念我衆勞至今心惻

金川之功允賴

上蒼靖彼蕃徽我武維揚勒碑太學用遵成例靜言思之
文以誌愧

四十二年禮部議各館謄錄人員如係肄業外班
於依限寫書之外仍可自理本業無庸扣除

五月

孝聖憲皇后升祔

太廟

恩詔國子監貢監生及各官學教習俱免坐監期一月

是年

廷試八旗各直省選拔貢生將一二等帶領引

見以知縣試用者十五人以部員用者九人餘交部以
教職佐貳用嗣經吏部言拔貢以部員用者向無
成案請照雍正八年湖北拔貢楊可鏡之例在七
品小京官上學習行走得

旨允行

四十四年多羅質郡王等奏四庫全書處貝字謄



錄內有前由寄籍順天入學旋經遵例改歸該省
原籍併有由

召試二等在館行走各生以在館謄錄不能回原籍應
試俱呈請就近在順天鄉試各取具同鄉京官印
結按照省分歸於南北中皿字號照例由本館咨
送國子監一體錄科應順天鄉試從之

四十五年

皇上七旬萬壽

恩詔

一

歷代帝王陵寢

先師孔子闕里應遣官致祭

一國子監貢監生及各官學教習免坐監期一月

一各省儒學以正貢作恩貢以次貢作歲貢

臣等謹按辟雍之名昉於大雅王制宋橫渠張子謂商以前本未有辟雍類宮之名文王建侯國之

學命曰辟雍亦猶謂其臺曰靈臺謂其沼曰靈沼耳
厥後治定制禮遂以為天子之制其說最優漢書稱
武帝欲治明堂濟南人公玉帶上黃帝時明堂圖於
是作於汶水上後漢書載建武中初營明堂辟雍靈
臺故東京賦曰左制辟雍右立靈臺薛綜注謂於之
班敎曰明堂大合樂射饗者曰辟雍記候節氣者曰
靈臺蔡邕又謂取其堂則曰明堂取其四門之學則
曰太學取其四面周環水圓如壁則曰辟雍異名而同

事其實一也毛萇詩傳曰水旋邱如璧曰辟雍以節
觀者白虎通曰辟雍者所以行禮樂宣德化也我

皇上御宇五十年法

祖敬

天登皇纂聖凡所以覺世牖民者固已隆風猷於至粹矣
乃復參稽周制酌古準今

特命新建辟雍於太學彝倫堂之南乙巳歲仲春吉日
親詣

文廟

釋奠禮成

臨雍講學爰開

經筵闡宣

御論大小臣工祇聆

聖訓諸生觀禮環集橋門

文教覃敷

殊恩特沛喬皇盛典洵千載一時也謹臚其制度規模

於左至

臨雍典禮儀節別詳載視學門焉

辟雍殿一座四面各顯三間內明間面濶二丈一
尺次間各面濶一丈六尺外週圍廊深六尺八寸
柱高一丈六尺徑一尺八寸擎簷廊深四尺三寸
四脊攢尖安銅寶頂重簷成造琉璃牌樓一座面
濶五丈五尺高三丈五尺五寸進深六尺六寸
碑亭二座各方二丈柱高一丈四尺五寸

石碑二統各高一丈六尺五寸

鐘鼓廳二座各方一丈四尺柱高一丈

圓河一座裏口徑過十九丈二尺深一丈

橋四座各長四丈寬二丈二尺

丹陛二道長二十一丈九尺寬二丈二尺

皇上親詣

文廟

釋奠禮成

諭稽古國學之制天子曰辟雍所以行禮樂宣德化昭
文明而流教澤典至鉅也朕此次釋奠禮成念國學
為人文薈萃之地規制宜隆而辟雍之立自元明以
來典尚闕如自應增建以彰美備著派禮部尚書德
保工部尚書兼國子監劉墉侍郎德成敬謹前往閱視
度地鳩工諏吉興建落成之日朕將行臨雍典禮以
昭久道化成之盛嗣經尚書德保等相度地勢定於
彙倫堂南營建繪圖進

呈

上諭德保等將辟雍圖式呈進自應仿照禮經舊制度
地營建即著德保劉墉德成總司其事敬謹承辦以
光盛典嗣於四十八年九月初五日興工

四十九年

諭稽古明倫設教典重學官國學為首善之區橋門觀
聽規制尤宜隆備前命尚書劉墉德保全簡侍郎德
成鳩工庀材興建辟雍現在已屆落成朕於明年仲

春

釋奠禮成即臨雍講學所有應行典禮著該衙門詳議具奏

欽派大學士伯伍彌泰大學士兼管國子監事務蔡新祭酒覺羅吉善鄒奕孝充

臨雍進講官

諭太學門集賢門匾額及繩愆廳博士廳六堂等處橫額俱換監額添寫清文

五十年正月

詔曰朕膺圖建極熙績撫辰恭荷

上蒼篤祐

列聖貽謨遐邇乂安版圖式廓夙夜兢業弗敢康寧仰惟
皇祖聖祖仁皇帝化成久道仁義漸摩

皇考世宗憲皇帝累洽重熙涵濡休養朕祇承

世德敬迓

鴻釐於今五十年壽逾古稀康強勤政稽三代以上帝王

御宇紀登久祚者代不數覲洎漢而後史冊更尠聞焉方今

昊穹申命繁禧茂祉集於朕躬五世元孫一堂衍慶緝熙純嘏之庥浹於海宇凡茲中外臣民咸登仁壽際斯熙會洵千載一時爰循

祖典於上春六日懋舉耆筵龐眉鳩杖集於闕廷者三千叟二月上丁恭行

釋奠迺臨新建辟雍引年講學用以導揚明和式昭觀

聽上儀既舉丕烈用光我國家億萬斯年之福申錫
無疆惟爾海內羣黎向化喁喁瞻依彌摯前者朕七
旬萬壽曾普頒恩詔閭閻澤覃敷今御極五十年嘉慶
疊臻兆民允賴是宜特沛殊恩下孚輿望用稱朕敬

天法

祖加惠黎元之至意

一

先師孔子闕里遣官致祭

一滿漢大臣命婦年過六十者俱加恩賜

一軍民年七十以上者許一丁侍養免其雜派差役
八十以上者給與絹一疋棉一觔米一石肉十觔九
十以上者倍之百歲者題明旌表並加賞大緞一疋
銀十兩

一各省儒學以正貢作恩貢次貢作歲貢

一國子監監生及各官學教習免其坐監期一月

又

諭朕此次

釋奠禮成臨雍講學園橋觀聽文教覃敷實為喬皇盛典且自冬春以來雨雪尚未霑足朕心焦切茲當俎豆馨聞恰值春膏霑霈深為欣慶第念隨從執事諸臣及觀禮多士衣履沾濕允宜廣錫恩賜所有執事扈從之王公大臣衍聖公並文武官員俱著紀錄一次其觀禮諸生及至聖各裔並加恩分別賞賚

御製國學新建辟雍園水工成碑記

名者實之賓實者名之主為學之方應務其實以漸
循其名不可炫其名以致亡其實興學之源綦要於
國學國學者天子之學也天子之學曰辟雍諸侯之
學曰泮水北京之國學自元歷明以至本朝蓋五百
餘年矣有國學而無辟雍名實或不相稱雖有建議
請復以乏水而格部議至今未復癸卯春始有復建
之諭甲辰冬乃觀新工之竣將於乙巳行釋奠禮遂
臨雍以落成焉夫北京為天下都會教化所先也大

典缺如非所以崇儒重道古與稽而今與居也雖乏
水然有不改之井汲以綆而用之無窮亦在人為之
而已於是石之鱗次見園斯池水之鏡澄見明斯漪
殿之據中見隆其榱桷之通行見接其基上庠下庠
雖難考二典之制而東序西序總不出三代之規則
是工之舉也又予知過論所謂於不可已者仍酌行
之之意而物給價工給值原非勞民動衆之為若夫
三老五更之說予以為括於養老化俗之儀而非天

子臨雍所必應並行而不遺者蓋弗見於詩書乃特
出於杜氏通典之私耳且予向有三老五更之說已
明闡其謬茲不復綴乎詞雖然予更有懼於是舉者
夫是舉豈非復古興學之懿有何懼而予懼之者恐
後之人執予復古之說於一切衣冠典禮皆效漢人
之制則予為得罪

祖宗之人匪教伊虐甚屬不宜也予之子孫體予此心於
可復古者復之其不可復古者斷不可泥古而復之

夫徒慕復古之虛名而致有忘

祖宗之實失非下愚而何予不為也予敬以是告子孫以
保我皇清萬年之基也

御製上丁

釋奠後臨新建辟雍講學近體詩四首

國學由來教化先北京建五百餘年空傳中統廟修

矣

案元史稱太祖平燕京以金樞密院為宣聖廟又
世祖紀中統三年修宣聖廟此皆言南城國子監

蓋元太祖初定燕京時所建也至選舉志稱至元二
十四年遷都北城立國子監學於國城之東又世祖

二十四年閏二月設國子監乃今城東國子監之權
輿也是以己丑年御製重修文廟碑記云國學始於
元太祖置宣聖廟於燕京乃指燕京初設國子學時
而言茲城東之文廟國子監則世祖至元二十四年
遷都北城所立而非中統所修矣向來記載
重疊每自相牴牾因爲訂正明晰附記於此獨惜辟

雍宮闕然酌古準今圖以創穿池引井壁成圓崇儒

重道心雖疊懼亦在茲記語宣古制天子之學曰辟
雍諸侯之學曰泮宮

北京國學自元歷明以至本朝五百餘年有國學而
無辟雍名實不稱雖有建議請復以乏水而格部議
昨癸卯春始命酌古準今穿池引新建園水復觀製
碑文以復古而不可泥古諄切誥誡詳見辟雍碑記
文

放勲巍蕩未言學教胄命夔始有虞夏序殷宗因遞
述文豐武鎬宣相殊橋園莫作徒觀者廷獻應為有

用儒却憶永平稱億萬

後漢紀稱明帝永平二年上始率羣臣恭養三老五更於

辟雍饗射禮畢帝正坐自講諸生執經問難於前冠帶搢紳之人圜橋門而觀聽者蓋億萬計云云所記未免失實臨雍盛典觀聽雖多然搢紳冠帶何至億萬人之多且園橋之間豈能容而人多擁擠亦必觀聽不及史傳之誣性往類是雖云善善却鄰誣

三五昔經著說詳謂他杜撰失荒唐

三老五更之說不見詩書惟禮

記出漢儒非孔子之言古傳始有三老求餒之文註疏者紛紛不一而恭邕獨斷遂有父事兄事之說白

虎通直以為老更各一人且曰父一而已不宜有三
其謬更甚杜佑通典亦宗其說真成杜撰矣向嘗著
說聞之許見三老五更祇宜養老示恩渥難並臨雍
說今命刻於辟雍碑陰

贊禮煌韓愈不甘弟子列蔡新或備伯兄行

韓愈答呂鑒山

人書謂世無孔子不當在弟子之列其見甚高其語
甚正若今之羣臣孰可當老更之席者獨大學士蔡
新長於予四歲或可居兄事之列然恐其
局趨弗敢當舉王導對晉元帝之語耳

慮其驚懼

謝無當

去聲

王導稱曾喻太陽

晉書王導傳卒登尊號百官陪列命導升御床

導固辭曰若太陽下同萬物蒼生何能仰照帝乃止

蔡母欲數上丁逢釋奠禮成臨辟雍舉事率因待時

節

北京國子監自元迄今五百餘年而臨雍園水之制未備癸卯春始命興建甲辰冬工竣此誠舉大

事者亦必有時節之待也

崇儒寧渠

去聲

在儀容五倫知止須勤最

一己自強切戒慵

是日講章題大學為人君止於仁為人臣止於敬為人子止於孝為

人父止於慈與國人交止於信易經天行健君子以自強不息

文質彬彬衆和樂重

熙茂對誌茲恭

又

諭朕此次

釋奠禮成臨雍講學諸生觀禮環集橋門允宜廣錫恩

施以昭盛典著於乾隆五十一年丙午科順天鄉試
皿字號卷內廣額十五名用示嘉惠膠庠鼓勵人材
之至意

又湖南學政錢澧奏請隨棚授考出貢不得過一
年以外從之

又定湖南陽清二縣遇拔貢年於二縣共拔一人

皇朝文獻通考卷六十八